

U POVODU IZDANJA 10 JUBILARNOG BROJA NAUČNOG ČASOPISA „ACTA GEOGRAPHICA BOSNIAE ET HERZEGOVINAE“

Navršilo se 5 godina od osnivanja Udruženja geografa u Bosni i Hercegovini, kada je zacrtanim ciljevima i zadacima, predviđenim u Statutu Udruženje geografa u Bosni i Hercegovini, pored ostalog, započeta i izdavačka djelatnost. U okviru iste nastalo je izdavanje naučnog časopisa Acta geographica Bosniae et Herzegovinae. Na kraju ove 2018. godine slavimo jubilej izdavanja 10 broja ovoga veoma važnog Časopisa.

Zacrtani pravci djelovanja Časopisa nagoviješteni su u prvom broju iz 2014. godine, kada je istaknut značaj Acte geographice Bosniae et Herzegovinae riječima: „*U ovom glasilu prezentirat će se naučni radovi, prema međunarodnoj klasifikaciji, iz domena fundamentalne i aplikativne geografije, a prevashodno koji se tiču Bosne i Hercegovine. Pored toga, Acta geographica Bosniae et Herzegovinae je otvoren naučni časopis za objavljivanje naučnih radova međunarodnog karaktera, koji predstavljaju opći interes razvoja geografske nauke. Ovaj Časopis prednost će dati radovima koji doprinose razvoju fundamentalne i konstruktivne geografije iz domena turizma i zaštite životne sredine regionalnog i prostornog planiranja i metodičko-didaktičke geografske problematike. Časopis će ustupiti mjesto kvalitetnim radovima, pored ostalih, poznatih i priznatih domaćih i svjetskih geografa, koji participiraju akademski domaći i međunarodni okvir.*”

Zacrtani pravci djelovanja u okviru Naučnog časopisa su kontinuirano ostvarivani u proteklih 10 brojeva. Radovi su svrstani prema međunarodnoj klasifikaciji u razrede: originalan naučni rad izvornog naučnog karaktera (original scientific paper); prethodno naučno saopćenje (preliminary communication); pregledni rad (review) i izlaganje (referat) sa naučnog skupa (conference paper).

U proteklih 10 brojeva ukupno je objavljeno 88 radova od kojih je većina originalnog naučnog nivoa. U tim radovima učestvovalo je 15 stranih autora i 8 koautora. Časopis smo potpuno otvorili za mladi naučni kadar, prevashodno mastere i doktorante što je, pored ostalog, i bio cilj pokretanja izdavanja ovoga Časopisa. Do sada su se mladi masteri i doktoranti pojavljivali 25 puta kao autori i 53 puta kao koautori radova. U tom broju bilo je 10 autora inostranih mladih istraživača.

Tematika radova odnosila se, pretežno, na fundamentalna i aplikativna geografska istraživanja. U prezentiranim radovima prednačili su oni iz domena fundamentalne geografije, a neki od njih odlikuju se novim metodama i metodologijom istraživanja i prezentacije.

Aplikativna istraživanja obrađivala su, prevashodno teme iz turizma i zaštite životne sredine, kao i geografskih osnova prostornog i regionalnog planiranja.

Rezultati prezentovanih naučnih radova doprinosili su, pored ostalog, nekim konstruktivnim rješenjima i praktičnim primjenama u geografskom prostoru i planiranju prostorne organizacije i racionalnog korištenja obnovljivih i neobnovljivih prirodnih resursa, zaštiti i obnovi životne okoline, informaciji o prostornim obilježjima i sl. U Časopisu su inkorporirani naučni radovi koji obrađuju tematike iz oblasti životne sredine ukazujući na probleme propusta koji su doprinjeli pretvaranju prirodnog u antropogeni pejzaž. S tim u vezi neki članci su inicirali naučne i stručne rasprave u davanju smjernica za preispitivanje učinjenih grešaka u životnoj sredini.

Neki radovi koristeći fundamentalne geografske oblasti bili su posvećeni geografskim istraživanjima sa veoma zapaženim interesovanjem, od kojih neki još uvijek su aktuelni od kojih ovom prilikom navodimo rad Geografski centar Bosne i Hercegovine. Ništa manje

nisu važni radovi i iz oblasti školske geografije, što je imalo odraza na prijedlog inoviranja nastavnog plana i programa nacionalne geografije u završnom razredu osnovne škole, kao i aktivnih rasprava koje se tiču udžbenika za učenje.

Časopis Acta geographica Bosniae et Herzegovinae, nakon 3 broja, odmah je bio prepoznat od strane 2 međunarodne baze, a danas njegove članke nalazimo u više njih od kojih su najznačajnije: GOOGLE SCHOLAR, ROAD ISSN, SUDOC, COBIS/OPAC-IZUM, LIBRARY OF CONGRESS.

Na kraju koristimo priliku da se javno zahvalimo Ministarstvu za obrazovanje, nauku i mlade Kantona Sarajevo i Federalnom ministarstvu obrazovanja i nauke na finansijskoj pomoći redovnog izlaženja naučnog časopisa Acta geographica Bosniae et Herzegovinae, jedinog takve vrste u Bosni i Hercegovini.

Urednički savjet časopisa Acta geographica Bosniae et Herzegovinae će razmotriti inicijativu glavnog urednika da reducira broj izlaženja tokom godine sa dva na jedan broj koji bi trebao izlaziti krajem kalendarske godine. Na ovaj način bi podigli naučni nivo na još veću razinu, smanjili pritisak na tehničku obradu i istovremeno smanjili utrošak sredstava. O ovoj inicijativi uskoro će potencijalni autori i članovi Udruženja geografa biti blagovremeno informisani.

Glavni i odgovorni urednik
Muriz Spahić